

Exelénsia Ministru Negósiu Estranjeiru Aurélio Guterres, Ministru Saúde Rui Maria Araujo, Ministru Edukasaun Fernando Hanjam, Xefe Estadu Maior Jenerál F-FDTL Major Jenerál Lere Anan Timur, Brigadeiru Jenerál Woodrow, ami-nia parseiru-sira iha governu lokál no nasional, membru comunidade-sira, no klaru Estadus Unidus nia Forsa Aérea iha Pasífiku (PACAF). Bondia.

Obrigada ba imi hotu ohin mai hamutuk ho ami hodi ensera ezersísiu Pacific Angel 2018 (tinan rihun rua sanulu resin ualu) iha Suai, Timor-Leste.

PACANGEL nu'udar ezemplu furak oinsá Estadus Unidus serbisu hamutuk ho Timor-Leste hodi harii kapasidade no parseria iha rejiaun Indo-pasífiku.

Estadus Unidus Amérika apoia ona Timor-Leste dezde nia independénsia no ami sente orgullu tebes hodi kontinua ita-nia relasaun-sira ho demokrasia foun ida ne'e.

Ami ho admirasaun no respeito sai sasin ba eleisaun antesipada ne'ebé halo ho dame, livre no transparente. Ami kongratula governu sesante ba nia dedikasaun no kompromisu ba demokrasia. Ami hein ba oin serbisu hamutuk ho governu foun atu hametin liu tan relasaun-sira entre Estadus Unidus Amérika no Timor-Leste.

Ami apoia Timor-Leste nia objetivu-sira rasik, hanesan harii instituisaun demokrátika-sira, no hametin kapasidade Timoroan sira nian hodi trasa rasik sira-nia futuru ne'ebé nakonu ho dame, isin-di'ak no matenek. Ami apoia esforsu-sira hodi diversifika sira-nia ekonomia no promove igualdade no oportunidade ba ema hotu.

Ita sei harii liu tan ita-nia kooperasaun liuhusi PACANGEL no ezersísiu-sira seluk entre militar sira. Ami sei kontinua hametin serbisu USAID, Peace Corps, no US Navy Seabees nian. Ami valoriza ami-nia programa-sira ba joventude, inklui fó bolsa-estudu-sira hodi estuda iha Estadus Unidus, ami-nia programa sira lian Inglés no apoiu sira ba siénsia, teknolojia no edukasaun matemátika.

Ohin iha Suai, ami sente orgullu boot serbisu hamutuk ho F-FDTL.

Iha Suai ne'e, ami serbisu hamutuk ho F-FDTL, funsionáriu sira governu nian, no líder comunidade lokál sira. Ita atinje ona objetivu-sira husi ezersísiu tinan ne'e nian no ita harii ona relasaun forte ba serbisu hamutuk iha futuru.

Ezersísiu ne'e konsentra liu ba assisténsia umanitária no fó ajuda iha dizastre. Maibé ita mós aproveita oportunidade ne'e hodi kompleta projetu sira ne'ebé sei fó benefísiu ba comunidade Suai ba tempu naruk.

Ekipa Enjeñaria konjunta sira hadi'a ona eskola rua – Escola Secundária Um Seran Kotek no Escola Primária Mata Air – nomós hadi'a instalasaun saúde sira – hanesan Ospital Suai, Sentru Saúde Rejionál Salele, Sentru Formasaun Saúde Pollo, no Klínika Saúde Has Ein.

Instalasaun sira ne'e sei mellora liu tan qualidade edukasaun no saúde ba Timoroan liu rihun neen nulu resin lima (65,000) ne'ebé hela iha Suai no fatin sira ne'ebé besik.

Aleinde ne'e, ami-nia servisu atendimentu saúde oferese ona atendimentu saúde jerál, ba labarik sira, terapia física, konsulta matan, no konsulta nehan ba Timoroan liu rihun lima (5,000).

Ha'u hakarak elojia Forsa Aérea Estados Unidos nian; Governu Timor-Leste; F-FDTL, funsionáriu lokál sira, profisionál saúde sira, no parseiru-sira seluk ne'ebé kolabora ona iha esforsu furak ne'e. Sein imi-nia servisu no dedikasaun makaas, misaun ne'e sei la sai susesu.

Obrigada permite ona ha'u ohin bele fahe susesu furak ne'e ho imi. Parabéns ba ami-nia parseiru-sira no amigu-sira hotu.